

«In project che merita respect»

Berna: Premi «Watt d'Or» per hoteliers grischuns

DA GION NUTEGN STGIER / ANR

■ **Ulteriur premi naziunal per Hotelleriesuisse Grischun. Suentar il premi «Milestone» ha l'organisaziun er retschet da la confederaziun in premi per il project «hotels cun efficienza energetica». La delegaziun grischuna è sa mussada zunt ventiraivla ier a Berna tar la surdada dal premi.** Dapi nov onns surdat l'Uffizi federal d'energia il premi «Watt d'Or» per prestaziuns extraordinarias en il sectur da l'energia. In team da persunas dal rom nominescha ils projects inoltrads per mauns da la giuria e quella valitescha lura il meglier project da mintga categoria. Presidenta da la giuria è cussegliera dals chantuns *Pascale Bruderer Wyss*. A la giuria appartegnan cun *Daniela Decurtins*, directura da l'Associazion svizra da gas e *Stefan Cadosch*, president dals architectes svizzers er duas persunas da noss chantun. En tut vegn il premi surdà en tschintg categorias ed ier saira a Berna è er vegnì surdà in premi spezial: scolaziun. Per ils premis 2015 è vegnids inoltrads 65 projects e victur en la categoria societad è quel da Hotelleriesuisse Grischun e *Gustav Lorenz*, «Tur da signals-hotels cun efficienza energetica Grischun».

Bler laud da la presidenta da la giuria

Il project dals hoteliers grischuns è oz betg mo enconuscent en noss chantun, mabain er sin champ naziunal. Ils 11 da november 2014 ha il project gia retschet en la categoria ambient il premi «Milestone», dapi 15 onns il premi il pli popular en la branscha da turissem. Cun la surdada dal premi «Watt d'Or» ier saira en il «Kursaal» a Berna han ils 100 hoteliers grischuns e l'iniziant dal project *Gustav Lorenz* retschet in ulteriur premi e quai gist quel da l'Uffizi federal d'ener-



In da quels hotels che fa part da l'acziun da reducir ils custs d'energia è er il «Kronenhof» da Puntraschigna.

MAD

gia. *Pascale Bruderer Wyss* ha ditg ch'il trend tar dapli persistenza en il turissem merita renconuschientscha. Quai che pertutga efficienza energetica saja il project da Hotelleriesuisse Grischun in fitg bun exempel e cun in resun positiv en l'entira Svizra. La presidenta da la giuria e cussegliera dals chantuns ha ditg che fin oz sajan gia 40 hoteliers en ils chantuns Berna e Vallais suandads l'exempel da lur collegas grischuns e quai saja in fatg zunt plaschaivel. *Pascale Bruderer Wyss* ha ditg a chaschun da la surdada dal premi: «Tut respect dals hoteliers grischuns.» Il premi «Watt d'Or» è betg dotà cun ina

summa, simbolicamain vegn surdà ina culla da naiv.

22 milliuns francs damain custs

Il project «Tur da signals-hotels cun efficienza energetica Grischun» saja ina istorgia da success, ha ditg *Jürg Domenig*, il mainagestiu da Hotelleriesuisse Grischun. Fin oz sa participeschan a quel project, per reducir las emissiuns da CO₂ entras in meglier manaschament, 92 hotels, tschintg bogns ed in affar d'aua minerala. Il project effectuescha ch'i vegn spargnà fin 15% custs d'energia e vitiers fatg insatge per l'ambient. Ils

hoteliers survegnan dals iniziants dal project, da la confederaziun e dal chantun sustegn professional per introducir ina energia pli effizienta e pli persistenta. Dal reminent sustegna la confederaziun mintg'onn ils hotels cun ina bella summa che sa drizza tenor ils custs d'energia da mintga manaschi singul. Grazia al proeject «Tur da signals-hotels cun efficienza energetica Grischun» duaian ils 98 hotels ed affars avoir fin il 2020 tutina 22 milliuns francs damain custs d'energia. Concret dastgian els quintar cun in respargn da 6,8 milliuns kilos ieli e gas.